

Empat lagi wakil parti selesai menghadap Agong hari ini
Astro Awani
10 Jun 2021
Hasimi Muhamad, Ridauddin Daud

KUALA LUMPUR: Presiden Parti Warisan Sabah (Warisan), Datuk Seri Mohd Shafie Apdal menjadi wakil ketua politik keempat selesai menghadap Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah di Istana Negara pada Khamis.

Bekas Ketua Menteri Sabah itu dilihat meninggalkan pekarangan Istana Negara pada pukul 4.20 petang selepas sejam menghadap Seri Paduka Baginda.

Terdahulu, beliau yang menaiki kenderaan jenis Range Rover berwarna kelabu dilihat tiba pada pukul 3.10 petang.

Selain Mohd Shafie, tiga lagi wakil pemimpin politik adalah masing-masing dari Pas, MCA, dan Parti Pejuang Tanah Air (Pejuang).

Pemimpin pertama yang tiba di Istana Negara pada Khamis ialah Timbalan Presiden Pas yang juga Menteri Alam Sekitar dan Air, Datuk Seri Tuan Ibrahim Tuan Man yang dilihat memasuki Istana Negara pada jam 10.22 pagi tadi.

Maklumat dari sumber mengatakan beliau dijadual menghadap Al-Sultan Abdullah pada jam 11.00 pagi.

Beliau dilihat meninggalkan Istana Negara pada jam 11.36 pagi dan tidak sampai 30 minit selepas itu, Presiden MCA, Datuk Seri Wee Ka Siong pula dilihat memasuki istana.

Kenderaan membawa beliau dilihat keluar meninggalkan bangunan istana kira-kira jam 12.54 tengah hari.

Pengerusi Penaja Pejuang, Tun Dr Mahathir Mohamad pula dilihat memasuki Istana Negara kira-kira jam 1.58 tengah hari.

Beliau dijadual menghadap Al-Sultan Abdullah pada jam 2.30 petang.

Sejam kemudian, kenderaan membawa Ahli Parlimen Langkawi itu dilihat meninggalkan Istana Negara pada pukul 3.00 petang.

Tiada sebarang kenyataan diberikan kepada media daripada semua pemimpin itu yang dilihat terus meninggalkan kawasan istana selepas pertemuan selesai.

Begitupun, Dr Mahathir mengadakan sidang media secara dalam talian pada jam 4.15 petang bagi berkongsi intipati pertemuan beliau dengan Seri Paduka Baginda.

Setakat Khamis, lapan pemimpin parti selesai menghadap Al-Sultan Abdullah termasuk Perdana Menteri, Tan Sri Muhyiddin Yassin.

Dalam perkembangan sama, beberapa lagi wakil parti politik termasuk Presiden UMNO, Datuk Seri Ahmad Zahid Hamidi dijangka menghadap Agong pada Jumaat.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-malaysia/empat-lagi-wakil-parti-selesai-menghadap-agong-hari-ini-302547>